

Atuartuni angajullerni klassinik inuussutissarsiornermi apeqqutini sammisaqartitsinikkut ilinniartitsisoqartalernissaa siunertaralugu Meeqqat atuarfianni peqqussut allanngortinneqassanersoq pillugu apeqquteqaat aallaavigalugu oqallittoqarnissaanik siunnersuut.

(Inatsisartunut ilaasortaq Ane Hansen, Inuit Ataqatigiit)

Akissuteqaat

(Ilinniartitaanermut, Ilageeqarnermut, Kultureqarnermut Naligiissitaanermullu Naalackersuisoq)

Siullermeerinnineq

Meeqqat atuarfiata inatsisaa ukiuni qulini pinngitsoorani atuartitaasussaataitanerup kingornatigut kajumissuseq naapertorlugu inuussutissarsiutinut sammisumik atuarsinnaalernissaq periarfissiuunniarlugu allanngortinneqassava? Apeqqut taanna isumaga naapertorlugu Anne Hansenip Inuit Ataqatigiinneersup apeqquteqaat aallaavigalugu oqallisissiaata ualeq manna oqallisigineqartussap qiteraa.

Inerisaaviup atuartunik angajullernik nalunaarsuinerani sulit takuneqarsinnaavoq atuartut ikittuunnaat atuarfik naammassiniariarlugu ilinnialertartut. Ukioqatigiimmi affangajaat meeqqat atuarfiata kingorna ilinniakkamik ingerlassisanngillat.

Ilaatigut tamanna peqqutigalugu Naalackersuisoqarfiga IMAK aamma KANUKOKA suleqatigalugu meeqqat atuarfiata sukumiisumik sumulluunniillu attuumassuteqanngitsumik nalilersorneqarnissaanut pilersarusiortussanik aqutsisoqatigiinnik pilersitsisimavoq. Illuatungeriit isumaqatigiissutigaat meeqqat atuarfiat ineriartorteqqikkumallugu inerisaalluni suliniutit piusut meeqqallu atuarfia pillugu inatsisit nalilersuinissap tunngavigissagai.

Naalackersuisut anguniagariuarpaat meeqqat atuarfiani atuartitsineq pitsanngorsarneqassasoq inerisarneqassasorlu meeqqat tamaasa pitsaasumik atuartinneqarsinnaalersillugit. Nassuerutigissalluguli aamma pingaartuuvooq inuusuttut ilinniartitaanikkut iluatsitsinngitsoortarnerannut meeqqat atuarfiat kisimiilluni aqqiissuteqarsinnaanngimmat. Meeqqat atuarfianni angusaasut pitsanngoraluarpataluunniit inuusuttut sulit ilinniartitaanikkut ingerlariaqqiffissaruttassapput aporfissaqartassallutillu ilinniartitaanivut annertusartuannikkutsigit.

Meeqqat atuarfianni atuartitsinermik inuussutissarsiornermut sammisumik pilersitsinikkut inuusuttut amerlanerusut ilinnialertassanersut apeqqutaavoq Naalackersuisut isumaat malillugu akiuminaatsoq perorsaanikkullu immikkut ilisimasallit akornanni eqqartorluarneqartariaqartoq. Qangaanerusoq atuarfimmik aqqiissuuseriaatsit assigiinngitsut assersuutigalugu 12. klassi allaallu 13. klassi tikillugu sivissuseqartinneqartarsimapput inuusuttut amerlanerusut ilinnialernerannik ersarissumik kinguneqartanngitsunik. Meeqqat atuarnermikkut pissarsiaanik atuarnerup "sivitsornerinnaatigut" qaffaasoqarsinnaasoq Naalackersuisut ilimaginngilaat. Atuaqatigiinnik kajumissuseq naapertorlugu inuussutissarsiutinut sammisumik pilersitsisoqassappat atuartut pisariaqartitaanik paasiniaqqiissaqqaarluni tamanna pisariaqarpoq kiisalu paasiniaqqissaarneqartariaqarluni kommunit meeqqat atuarfii sulisoqarnikkut aningaasatigullu suliassaq ingerlassinnaaneraat. Ilinniartitaanermut pilersaarut II-mi allaaserineqartut Naalackersuisut inuusuttut inuussutissarsiutitigut ilinniarnermik ingerlatsiutigalutik branceskolini qaffassarnissamut periarfissinneqartalernissaat pillugu branceskolit oqaloqatiginiarpaat. Naalackersuisut

siunnersuuteqartoq oqallisissiamik pisarialimmik saqqummiussineranut qutsavigaat partiillu
apeqqummut pineqartumut isummersornissaasa tusarnaarnissaat qilanaaralugit oqallilluarnissamik
kissaassivugut.